

## Mar Maroun Post 2021

[بهاالنهار، من عيد نشر هالبوست رغم إني يمكن كتار قريوه، بس بعدها هالحقايق بعيدة من إني تكون معروفة من قبل أغليبتنا، وكل عيد مار مارون وإنتو بخير (موارني وغيرن من مسيحيين) إذا بتطبقوا مبادئ الناسك مارون وجماعتو الأولى بلبنان، ولو بلا ما تنتسكوا ع راس جبل...]

بهل عيد بحب عيد المسيحيين عمومًا، والموارني خصوصًا، بعيد مار مارون، بي الطائفة المارونية، هل الموارنة يلي شاء القدر، مع كمّ من المقاومة والتضحيات، إني حملو اسم لبنان عبر العصور تصار اسم الجمهورية؛ بس الأهم إني منحب نبش نخلص من المعلومات الغلط يلي توارتوها أهم المؤرخين وصارت موجودة بأهم الكتب، أو يلي انتشرت بالمجتمع من برات الكتب، يلي اليوم العلم حطّا عجنب:

- "مار مارون هرب ع لبنان": لاء. توقّا ب "كفر نابو" صوب حلب صوب ٤١٠ (آخر مكتوب بخصه بالـ ٤١٠) وعالأرجح ومش أكيد إني ندفن بضبعة "براد" (إذا مش ببراد، ما منعرف). في حدا تاني اسمو يوحنا مارون، عيدو ب٢ آذار، وما هرب ع لبنان؛ بالعكس، طلب يكون أسقف البترون عام ٦٧٦ وإجا وبلش ينظم المقاومة العسكرية بجبل لبنان من عكار لجزيين ضد الإسلام يلي هني اليوم معنا بدولة لبنان (مع محبتنا واحترامنا بس هيك التاريخ، ما يزعلوا، وما يزعلوا السريان والروم أدناه)، وأسس "كنيسة لبنان الحرة" سنتها، وصار أول بطريرك ماروني سنة ٦٨٤.

- "جمجمة مار مارون يحي بكفر حيّ بقضاء البترون": في شقفة منها حسب مسار كل شي نكتب بهالموضوع عبر التاريخ، بس أكيد ما في اثبات بيولوجي / جيني.

- "مار مارون أسس طائفي": لاء. مار مارون ما عمل إلا يقدم مسلك معين لعيش الديانة المسيحية ارتكازًا عالزهد والتنسك، علمًا إني الديانة المسيحية ما بتلزم هالشي، وكل شخص إلحق يعيش الـ "فقه" المسيحي، يلي هوي توصيات المسيح يعني المحبة والتواضع والغفران (ما تخلطو هالإشيا مع تعاليم الكنائس العديدة)، مطرح ما هوي موجود: بمغارة أو بالمديني. بس مار مارون هو الشخص الوحيد (بالمبدأ) يلي أتباعو شكّلوا حالة جماعية عفوية من خارج الإكليروس، وصاروا طائفة مع الوقت.

- "الموارنة شعب": لاء. الموارنة هني أتباع مارون يلي صاروا مذهب / طائفة، وين ما توجّدوا. أول مرّة مذكور مُفرد "الموارنة" كجماعة اجتماعية (مش بس دينية) هو حوالى سنة ٩٠٠ (تسعمية، ما في غلط).

- "الموارنة ضبضبو كلاكيشن ولملموا حالن وهربوا ع جبال لبنان الفاضية": لأ ما كانت فاضية وع فكرا ما كان في شيعة بعد... ليش مين قصّ شجر الأرز ع كل الجبال؟ ومين عمل أفقا وقلعة بيت مري والخمارة بعاليه والمعبد بدير القمر يلي هو اليوم كنيسة سيدة التلة وبعد كتير إشي بالجبل؟ وكيف في كتير آثار رومانية متلاً بالميتين (بالزعرور) وبشحيم بإقليم الخروب؟ (أغلبية الآثار الرومانية بلبنان تعمّرت على آثار كنعانية (فينيقية وفق التسمية اليونانية))... وكيف الألمان ساردين عشرات أسامي الضيع على إنا لغويًا كنعانية؟ وبعد في كتير حجج بس بزيادي لهلق. صحيح أكلوا بسوريا كرا كف من قبل المسيحية (من قبل السريان) وبعدان من الإسلام وظرفيًا من البيزنطية، بس يلي إجو هني أعداد قليلة أغليبتن رهبان من دير مارون الشهير بأفاميا بسوريا يلي كان هو أكثر شي ينعزا...

- الموارنة قال شو، قال لجأوا لمعاوية ليأمنلن مهرب ع جبل لبنان تيهربو من الروم... هوي معاوية يلي أنزل المرابطين ع ساحل لبنان، تيحاصر سكان الجبل حسب مخطوطا حاملي ختمه ويفتك فيهن (ويصد الأسطول البيزنطي أكيد)...

- الموارنة قال شو، الموارنة أنباط (خدلك) إجو من شمال شبه الجزيرة العربية عالبقاع والجنوب و"يمكن الشوف" (حسب المؤرخ يلي كثير مشهور ومعروف إنو عروبي...). كل هول النظريات عمرا ١٠٠ سني، إنو يا شباب إنتو آخرتا سورية أو عرب (أو التتئين)، ليش ما بدكن الوحدة مع سوريا؟ (ما عنا شي ضد سوريا وشعبا بس مش ممكن ندوب حالنا عدديا بالإسلام بعد أكثر)...

الحديث بطول بعد، بس بكفي لليوم نقول إنو الموارنة هني كنعانية جبل لبنان يلي كانوا دينيا وثنيين (بتحفظ، لأنه عالرجح كانوا موحدين قبل اليهود) وصاروا مسيحيين بعد ما إجا مين يبشرن من أتباع مارون يلي إجو من شمال غرب سوريا، بين ٤٥٠ و ٥٠٠ ميلادي.

وع فكرا، مارون ما كان سرياني، بس كان يستعمل السرياني كلغة فصحي وليتورجية، وإلا الموارنة اليوم بكونوا عرب مسيحيين...

"في فمنا ماء" مثل ما بقولوا بالعربي، بس بزيادة لليوم.....

ع كل حال، هني هالجماعا فتتو الصخر وجلّو الجبال وعاشوا القلة والتواضع والزهد بروحانية ليوفوا للحرية معناتا، وهيك ولا مرة دفعوا جزية وولا مرة كانوا أهل ذمة، ضاينوا ٧٥٠ سنة محاصرين مقطوعين عن العالم (عدا ٢٠٠ سنة من الاحتلال الصليبي). ولمن صار الوضع لمصلحتن بل ١٩٢٠، انفتحو عل الكل بتسامح وغفران ومحبة... هاي تعاليم يسوع المسيح، هاي يلي أكد عليا مار مارون لمن شطحت الكنايس...